

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 445746 23 St
Tuzla, 15.02.2024. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „KARITEX“ d.o.o. za proizvodnju, promet i usluge Lukavac, ul. Gnojnica 150, nakon provedenog stečajnog postupka, donio je dana 15.02.2024. godine sljedeće:

RJEŠENJE

OTVARA SE stečajni postupak nad imovinom dužnika „KARITEX“ d.o.o. za proizvodnju, promet i usluge Lukavac, ul. Gnojnica 150, matični broj subjekta 1-9010, JIB: 4209162570006, račun broj: 1321200309384602 otvoren kod NLB banka d.d. Sarajevo.

Za stečajnog upravnika imenuje se Nedim Unkić iz Gradačca, ul. Gazijaska b.b.

ZAKLJUČUJE SE stečajni postupak nad imovinom dužnika „KARITEX“ d.o.o. za proizvodnju, promet i usluge Lukavac, ul. Gnojnica 150, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 445746 23 St od 27.09.2023. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „KARITEX“ d.o.o. za proizvodnju, promet i usluge Lukavac, ul. Gnojnica 150, a za privremenog stečajnog upravnika imenovan je Nedim Unkić iz Gradačca, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 20.10.2023.godine. Iz izvještaja privremenog stečajnog upravnika i navoda datih na ročištu proizilazi da je društvo prestalo sa radom 2005. godine, zbog nemogućnosti da se izmire dugovanja prema PU F BiH uslijed čega su nastupile blokade računa dužnika iste godine, kada je nastupila i platežna nesposobnost dužnika koja traje i do danas. U navedenom periodu zastupnik društva je bio Karić Mujo, nakon čega je za direktora imenovana njegova kćerka (kako bi Karić Mujo se mogao zaposliti u drugoj firmi i imati zdravstveno osiguranje), nakon čega je zbog istih razloga 2008. godine za direktora imenovana Adisa Burgić rođ. Sakić koja je samo iz formalnih razloga imenovana kao zastupnik jer društvo već tada duži vremenski period nije poslovalo. Društvo ima neizmirene obaveze po osnovu javnih prihoda prema PU F BiH, dok zbog nedostatka dokumentacije u prethodnom postupku nije bilo moguće utvrditi da li postoje dugovanja prema trećim licima. Tokom 2008. godine je pokrenut postupak likvidacije ovog društva, ali vjerovatno zbog postojanja dugovanja isti nije mogao biti sproveden. Društvo nema u vlasništvu nepokretnosti niti pokretnih stvari, nema novčanih sredstava s obzirom da su računi blokirani, niti bilo kakve druge imovine koja bi se mogla unovčiti.

Dakle, privremeni stečajni upravnik nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti, da postoji stečajni razlog za otvaranje stečajnog postupka predviđen članom 6 stav 2 i članom 102 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 29.11.2023. godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama uplate iznos od 7.053,00 KM na ime otvaranja stečajnog postupka, iz kojeg predumjmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 96/23 dana 13.12.2023. godine, oglasnoj tabli suda dana 30.11.2023. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama FBIH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.